

四庫全書

史部

欽定四庫全書

平定準噶爾方略前編卷二十一

雍正九年春正月戊辰

蠲陝西甘肅額賦

上諭內閣曰朕思惠養黎元之道莫先於除賦蠲租使
萬姓均霑渥澤陝西甘肅二省經理軍需數年凡米
糧芻牧車馬牲畜之類皆動支公帑備辦一絲一粟
不使擾民然朕每念地方既有軍務縱不取辦於民

財未嘗不資藉於民力而陝甘二省之民人踴躍趨事甚屬可嘉年來已屢降蠲賦之旨茲特再沛恩膏將雍正九年西安所屬額征地丁銀蠲免十分之三甘肅所屬額征地丁銀全行蠲免該督撫等可轉飭有司敬謹奉行務令閭閻均霑實惠

以湖廣提督兼理陝西西寧西大通總兵官事
馮允中專管西寧總兵官印務正紅旗漢軍副
都統管承澤署陝西西大通總兵官

已已

選直隸山西等處兵赴陝甘

上諭大學士等曰直隸古北口宣化鎮及督標兵丁內
著總督唐執玉會同提督路振揚揀選馬兵一千名
派委官弁領赴西安山西太原大同兩鎮標營兵丁
內著巡撫石麟會同該鎮揀選馬兵一千五百名派
委官弁領赴甘州河南南陽河北兩鎮標營兵丁內
著總督田文鏡會同該鎮揀選馬兵一千名派委官

弁領赴西安並聽大將軍岳鍾琪署總督查郎阿調遣再著湖廣總督邁柱將附近陝西之標營兵丁預選二千名聽候調撥此所派弁員俱著賞給一年俸銀再令該督撫等寬裕幫給兵丁各賞銀三十兩給與兩個月行糧月餉馬三匹其派出官弁員缺該督撫等酌量委署兵丁額缺即行召募補足併行令岳鍾琪查郎阿知之

庚午

命工部左侍郎馬爾泰協辦西安軍務正紅旗滿洲都統德成協辦青海噶斯軍務

敕諭副都統達鼐

達鼐奏言賊圍噶斯卡倫臣以關防交鼐滿岱並調西寧綠旗兵三百備番臣親率兵出邊往援柴達木賊若敗遁即行追襲奏入得

旨達鼐領兵前往應援格默爾等亦是但奏稱追襲甚屬孟浪已理坤之兵原為搗賊人巢穴而設噶斯之

兵乃為駐防而設若來犯噶斯之賊兵無多勢均力敵則即行勦殺倘以勁力擾動青海則噶斯隘口屬無用之地即撤兵退至近邊形勝之處會集青海之兵駐劄防守倘賊勢頗重即領兵退入邊內爾從前曾將西寧之兵調撥五百名今又為番人調兵三百如果番人有事爾之三百兵丁何能濟乎兵力宜聚而不宜分頻頻分調是何計策防守邊圉較防守青海尤為急務目今只宜堅守切不可急遽蹂妄

辛未

命保舉辦理軍需人員

上諭內閣曰陝西甘肅地方辦理軍需須用年力精壯
才可辦事者命往以備差委現在分部學習人員內
著該堂官保送其候補候選及降革官員無錢糧未
清之案者漢軍人員著該旗大臣揀選保送滿漢大
臣等若有深知之人不論漢軍漢人亦准其舉出若
該員身有掛欠處分果係才能出衆亦准該旗及滿

漢大臣等保送請旨此差往人員著交與巡撫武格
許容協辦軍需侍郎馬爾泰酌量差遣委用將來辦
事若好著該督撫等奏聞加恩議叙

命派撥喀喇沁土默特等處兵預備調遣

上諭內閣曰喀喇沁三旗土默特二旗著派兵一千名
於二月間起程至張家口外形勝地方居住令貝子
僧衮扎卜塔布囊羅卜藏策卜登統領前往預備軍
營調遣歸化城兵丁著派一千名令都統根敦統領

於二月間前赴涼州聽大將軍調遣其恩賞銀兩糧餉等項俱照例給發

命給北路副將軍查弼納昭武將軍印馳驛赴軍

癸酉

命甘涼西寧三鎮增募兵丁

上諭大學士等曰甘涼二鎮皆係沿邊重地必須兵力富足方可內為保障外供調撥著提督宋可進於涼州召募兵丁二千名甘州召募三千名如甘州本地

不能足三千之數可於寧夏召募補足又西寧一鎮
為青海門戶所關綦重亦著召募二千名此召募七
千兵丁俱照例馬六步四支給錢糧

命派撥奉天等處兵往北路軍營

上諭大學士等曰奉天兵一千五百名著副都統額爾
勤統領黑龍江兵二千名著副都統王常索倫總管
沙津統領寧古塔兵一千五百名著副都統烏察喇
統領察哈爾兵一千名著總管達什統領前往北路

軍營應賞銀兩寬裕賞給其派出兵丁六千名著各該處將軍副都統等照數將餘丁充補

諭寧遠大將軍岳鍾琪撥兵募兵事宜

岳鍾琪遵

旨議奏言準噶爾逆酋犯界所有增撥官兵事宜臣詳加籌畫撥大原提標兵二千令慶陽協副將于義領之陝西督標兵八百撫標兵二百檄調山西蒲州協副將沈力學領之皆隨臣出口至安

西沙州極邊之地撥鎮協標兵三千往巴理坤
其安西沙州城守單弱除督臣已調甘肅提督
兵一千移駐外臣又撥甘州兵一千分防其地
甘肅地當要害留汎之兵不足守禦而西寧為
青海門戶亦宜防範臣同西安將軍秦布撥西
安八旗兵三千令副都統蘇穆爾濟率千人往
西寧其一千赴甘州駐劄一千暫駐涼州候調
現在西安除蘇穆爾濟以大臣率兵往西寧外

祇餘兩副都統留辦軍務未可更行遠遣伏乞
欽命諳練軍機大臣二人馳赴西安統兵分往甘涼奏
入得

旨朕前調撥涼州駐防兵赴肅之後即著於西安滿洲
兵丁內挑選一千名交與副都統僧保張正文帶領
前往涼州駐劄又念西寧為青海門戶特命副都御
史二格馳赴西安帶領綠旗兵一千名滿洲兵一百
名前赴西寧駐防今岳鍾琪將滿洲兵一千名撥往

西寧殊可不必著仍遵前旨併傳諭武格馬爾泰侯
二格到日即於西安綠旗兵內或督撫兩標或城守
之兵共揀選一千名再會同秦布挑選滿洲兵一百
名令二格即行帶領前往西寧駐劄其蘇穆爾濟帶
領之滿洲兵一千名即令帶往涼州俟僧保到涼之
日蘇穆爾濟仍回西安其所撥駐劄甘州之滿洲兵
一千名著張正文帶領前往聽候調遣至撥往涼州
之兵不必起身前去仍在西安候旨西安副都統員

缺著副都統拉薩立馳驛前往署理岳鍾琪又奏言
甘州固原肅州兵各派撥出口甘肅地近邊居
守不容單薄應各募兵一千以馬六步四補入
西安省會之區督撫兩標除撥調外餘兵無幾
並應募戰守兵一千五百名至固原內地無庸
募補奏入得

旨朕屢降諭旨以甘涼肅西寧等處皆沿邊要鎮必得
重兵駐防既可彈壓邊陲又可分撥策應今岳鍾琪

僅於甘涼二處議募一千名想未接到朕之諭旨又
於現今已里坤情形未能確知是以尚存輕事之意
見固原標屬雖係內地但提標之兵已撥二千名則
自應召募補額西安督撫標之兵既行召募則自當
仍遵原制以馬六步四充補不得悉補步兵可將甘
涼固原西寧召募之事傳諭范時捷宋可進令其辦
理其西安督撫兩標應募之兵著岳鍾琪查郎阿武
格馬爾泰仍照馬六步四之例速行募足二千名以

充行伍

乙亥

命優叙西路破賊將士進階賞卹有差

上諭大學士等曰準噶爾賊人乘我西路軍營不備傾其醜類犯我卡倫盜趕駝馬總兵官樊廷等領兵二千轉戰七晝夜擊殺賊衆又將盜去駝馬牲畜奪回樊廷忠勇冠軍頗得勝算總兵張元佐副都統綽般台吉袞布三等台吉定咱喇什領兵應援奮力夾攻

大敗賊人副將張朝良以孤軍被困而能全師出圍
凡此將弁皆見義能勇致身効力均屬可嘉樊廷著
賞銀一萬兩給一等輕車都尉張朝良治大雄俱著
賞銀五千兩給騎都尉張元佐綽般俱著賞銀三千
兩給雲騎尉台吉袞布著封公爵三等台吉定咱喇
什著授為扎薩克一等台吉其餘有功將弁俱著大
將軍岳鍾琪查明奏聞加恩從優議叙再著署內務
府總管鄂善馳驛前往肅州於軍需銀兩內動支十

萬兩令大將軍將此番出征弁兵等查明戰功等第
按名賞給至陣亡將弁兵丁分晰查明造冊具奏從
優賞卹該督撫動用正項錢糧於安西地方建立忠
勇祠將陣亡之將士等設造牌位致祭俾義烈將士
永遠流芳以示朕崇獎忠勲之至意

命選撥青海及科爾沁等旗兵於青海歸化城要地分
駐調遣

上諭大學士曰準噶爾賊衆犯我西路科舍圖卡倫今

雖敗遁或由噶斯一路遣兵擾害青海地方刼掠馬駝羊畜亦未可定二等侍衛殷扎納著加副都統銜前往青海傳諭各扎薩克於左右翼揀選兵丁一萬名令王額爾德尼額爾克托克托鼐會同王益蘇克旺扎爾公阿喇卜坦扎穆蘇公阿喇卜坦統領在青海緊要適中之地駐劄派出之官員照伊品級賞給半年俸銀兵丁每名賞銀五兩再著內大臣克什圖前往青海與王額爾德尼額爾克托克托鼐等一同

管理克什圖所管阿爾台一路臺站事務著商都達卜遜淖爾總管五十四張家口管站郎中倫岱辦理

又

諭曰西北兩路或尚有應撥兵丁之處朕思歸化城乃通行兩路之地著理藩院傳諭四十九旗扎薩克等按旗均算派出精兵五千名由各該游牧處於二三月間前後起程沿途牧放馬駝至歸化城會齊擇形勝地方駐劄以備調遣其需用口糧於歸化城倉支

領月餉於張家口同知存庫銀內動支戶部核算尋
議曰科爾沁等十旗撥兵一千八百一十五名
烏朱穆秦等十旗撥兵五百六十九名翁牛特
等十一旗撥兵一千三百二十四名四子部落
等六旗撥兵二百三十二名鄂爾多斯等六旗
撥兵一千六十名凡兵五千各轄以協理台吉
管旗章京副都統叅領佐領驍騎校等官令蘇
尼特王垂際功蘇隆統之巴林王桑里達扎賴

特貝子特古斯協理再撥歸化城兵一千名叅
領二人佐領四人驍騎校四人令副都統塔爾
馬善領之其夫給銀米如例奏入

上從之

命查弼納仍為北路副將軍

上諭大學士等曰前令查弼納與順承郡王錫保同辦
軍營之事今大將軍傅爾丹既不領兵前赴西路會
剿查弼納仍以副將軍協同傅爾丹辦理軍務其昭

武將軍印信查弼納攜至軍營交與傅爾丹收貯將來查弼納有分路帶兵之時即用此印

癸未

命揀發直隸河南山西同知以下官能辦軍需者赴肅委用

甘肅巡撫許容疏言甘肅地多衝要兼辦軍需請於直隸山東河南山西四省同知通判州縣中令各督撫選長才敏事者五人至甘肅供調

遣以要缺題補奏入得

旨著照所請行山東現有賑恤之事正須幹員經理不必揀選咨送

甲申

賞卹西路破賊將士

上諭大學士等曰準噶爾賊衆侵犯西路汎界盜竊駝馬乘我不備事起倉卒其力戰克敵者甚屬可嘉而授命疆場者尤為可憫前已降旨令建忠勇祠春秋

祭享以表忠節矣茲應賞給世職令其子孫承襲永誌恩施副將徐宗仁著給興騎都尉守備劉貴才劉芳雨李國勲俱著給與雲騎尉其應得卹典仍著該部察例具奏千總王大謨徐維新外委把總方正劉世勲俱著該部從優議卹此外如有應加恩卹之弁員俱著大將軍岳鍾琪查明具奏凡陣亡兵丁於卹賞定例之外俱倍加賞賜其隨役人等有受傷亡故者照兵丁卹賞定例給賞朕今以酒三爵遙酌陣亡

將士著署內務府總管鄂善將酒齋往軍營凡陣亡
將士每名以羊一隻奠祭宣朕憫惻傷悼至意朕不
得已而用兵本期全師克敵不損一人乃為至願豈
必捐軀致命始稱効忠報國乎今此陣亡弁兵朕雖
加恩優卹而惻怛不忍之念愈覺難釋於懷著鄂善
將朕諭旨徧行宣布令衆知之至所賞賚銀十萬兩
鄂善至軍營時或與大將軍岳鍾琪或與護大將軍
印務紀成斌分別將弁兵丁建功出力之等次秉公

賞給務使均霑恩賜以示國家酬庸獎勲之令典尋
兵部議覆西路陣亡將士署叅將徐宗仁應贈
署副將給恤銀六百兩署守備劉貴才應贈守
備給恤銀四百兩各廕子弟一人以守備用劉
芳雨李國勲應贈守備各給恤銀三百兩千總
王大謨徐維新均贈署守備各給恤銀一百五
十兩外委把總方正劉世勲並贈千總各給恤
銀一百兩俱廕子弟一人以衛千總用其餘徐

宗仁等祭葬銀兩令禮部工部奏明賜恤如例
奏入

上從之

丙戌

命議休息西路破賊將士

上諭大學士等曰此次準噶爾之事出於不備總兵官
樊廷等率領弁兵奮勇先登以寡敵衆兵丁中有凍
傷手足者有冒犯鋒鏑者此等甚為可憫著傳諭大

將軍岳鍾琪令其各還內地營汛另選兵以代之至將弁等雖與兵丁不同亦當曲為體恤樊廷為軍功之首朕欲擢授提督並令回居任所軍前山永副將張朝良降旨陞為重慶總兵官其印務暫令他員署理凡此禦賊有功之將弁自總兵以至千把朕意俱遴員代其職任令暫回內地本任以息勞肩若云領兵大員一時難得其人朕已簡選石雲倬馬紀勲王緒級張存孝等數人命往軍前皆可充總兵之選況

此後進取之策正須從容經理目前並非進剿之時
伊等暫時休息將來大舉再赴戎行未嘗不可也著
岳鍾琪細心密議以聞樊廷統兵在外遣人報知大
營而外委把總馬能不畏賊鋒閱歷險阻以通音信
著以守備用賞銀五百兩其同馬能報信之二人及
越山赴營之弁兵並著查明從優叙賞

丁亥

命賞圖古里克營筆帖式奇書等

上諭大學士等曰據紀成斌奏報北山之賊已退而鄂龍吉一帶尚有賊營駐劄我軍貯糧之處宜籌畫萬全圖古里克收糧之筆帖式奇書以二百餘人竭力衛糧捍賊賊衆圍困數日能固守糧營保全軍實深屬可嘉著賞給雲騎尉再賞銀五百兩其同在圖古里克之弁兵著岳鍾琪查郎阿查明到日從優敘賞

二月戊戌

授常賚為鎮安將軍統甘肅等處移駐兵

上諭大學士等曰肅州甘州涼州移駐滿洲兵四千名
又涼州有歸化城兵一千名尚無統領之員寧夏滿
洲兵現今不過六百名著戶部右侍郎傅泰前往署
理寧夏將軍印務其肅甘涼等處兵丁著常賚前往
給以鎮安將軍印信令其統領仍聽大將軍岳鍾琪
調遣又

諭曰常賚統領五千兵丁或應會駐肅州或應會駐安
西或仍暫分駐於肅甘涼等處爾等行文知照各該

處外再傳諭大將軍岳鍾琪署總督查郎阿此五千
兵丁如有調遣俾其自為一隊令常賚統領不可零
星分派與綠旗兵丁混雜一處恐滿漢彼此推諉轉
有未便留此大隊為應援夾攻之師甚為有益

擢甘肅布政使孔毓璞為都察院左副都御史仍留肅
州辦理軍務

庚子

命晉貝子頗羅鼐及其子台吉珠爾瑪特策卜登爵

上諭理藩院曰布魯克巴部落人等互相讐殺貝子頗
羅鼐遣使解和宣朕威德甚屬可嘉著封為貝勒伊
子一等台吉珠爾瑪特策卜登屢次領兵効力邊疆
著封為輔國公

癸卯

護理寧遠大將軍紀成斌奏賊退後防禦應援
事宜

命岳鍾琪核議以

紀成斌奏言準噶爾賊兵在鄂龍吉者以正月十一日十二日退去尋有鄂爾多斯餘丁被擄脫歸詢之知賊已遠遁臣復遣人各路偵探俱無賊兵踪跡即於木城噶順鏡兒泉察罕哈瑪爾洮賚度集所在各設卡倫置兵更戍以資哨望再我軍凡十二營自東至西首尾倉猝不能相應臣計各標營兵中除被創有病者令其調

養外現在精兵可得一萬一千餘名更選九千
令總兵官張元佐樊廷顏清如曹勦分領防禦
東西中三處聯絡應援奏入得

旨紀成斌但言挑出精兵一萬一千餘名其固守營盤
若干並安西肅州之兵六千人作何分駐之處並未
詳晰且收放官羊之鄂爾多斯餘丁被擄逃回則各
廠收放之兵亦必有被賊擄去者其陣亡若干被創
若干皆未言及著傳諭大將軍岳鍾琪逐一查明據

實密奏如戰陣損傷之兵內有殘廢者照例給與半
餉其被擄逃回之鄂爾多斯餘丁著送來京有詢問
之處準噶爾降夷托克托和及所獲賊夷布庫著一
併解京

乙巳

命代駐藏將士

上諭大學士等曰駐藏之官弁兵丁等已經數年未曾
更換朕心深為軫念查從前派往之兵係陝西一千

名四川一千名今陝西兵丁現有征勦準噶爾之事
難以派往西藏四川新募充伍之兵甚多著提督黃
廷桂巡撫憲德酌量於新舊兵丁內揀選二千名前
往西藏將從前駐藏之兵換回其弁員等自總兵以
至千把亦應更換若大員內一時不得職銜相當之
人可揀選幹員加銜委署前往

獎諭貝勒頗羅鼐

上諭頗羅鼐曰朕為統一天下之主凡四海生靈一視

同仁無分中外乃者附近帕爾城之布魯克巴地方
人等起釁構兵互相仇殺朕聞之深為不忍軫念於
懷爾能仰體朕意遣使與班禪額爾德尼之使一同
前往和說又遣使宣諭朕之恩德布魯克巴地方人
等遂感悟息爭輸誠向化各帶部落敬順無違且請
朕施恩訓誨朕甚嘉悅布魯克巴地方人等自茲以
往宜各守疆界共相和睦永遵佛教祇奉恩綸如能
黽勉力行朕自益加優眷布魯克巴之諾顏林親齊

雷喇卜集後身喇嘛扎色禮布魯克古濟等著加恩
賞賜噶碧東羅卜喇嘛率衆先歸尤為可嘉著從優
賞給以示朕懷遠嘉順之至意爾可將此諭旨宣諭
布魯克巴地方人等知之

丁未

增給軍營兵月米

上諭大學士等曰從前阿爾台兵丁駐劄之時糧運維
艱是以廷議每兵每月祇給米一斗併羊價五錢邇

年以來羊價漸長所給銀兩不足羊隻之值月米一斗亦有未數不免半菽之虞朕心深為軫念查察罕度爾每年屯種所獲富有餘貯而運送糧石較前亦易著將現今調撥軍營防守之滿洲兵丁每名月給米二斗四升九合其戍守阿爾台之滿洲兵丁每名月給米二斗至察哈爾土默特兵丁每名月給米一斗五升以示朕恩恤兵丁之意

己酉

命代駐藏大臣

上諭大學士等曰西藏駐劄弁兵已降諭旨更換護軍
統領馬拉內閣學士僧格在藏年久朕甚憫念命正
藍旗蒙古副都統青保大理寺卿苗壽前往替回但
二人一時回京新任之人不能熟悉西藏事宜著馬
拉先回留僧格同青保等再辦事一年馬拉僧格各
賞銀一千兩

癸丑

飭諭寧遠大將軍岳鍾琪

卷二十一

岳鍾琪奏軍機事宜十六條一吐魯番地方饒
沃宜廣屯種一吐魯番通伊犁路為逆夷出入
咽喉宜設卡倫一準噶爾所屬回人宜先收撫
一巴里坤等處宜多駐兵以分戰守一出兵襲
擊逆夷使不得駐牧一駐吐魯番兵丁宜酌駝
馬定數一領兵官宜增撥遣一牧放牲畜宜嚴
防範一酌增羊隻以裕兵食一巴里坤新城宜

多積糧石一綠旗兵餘丁無庸增設一酌增車
兵器械一酌移駐吐魯番定期一辦運屯田農
具籽種一聯絡吐魯番巴里坤聲息一預籌進
剿兵數奏入得

旨大將軍岳鍾琪陳奏軍機十六條朕詳細披覽竟無
一可採取之處朕心深為憂煩岳鍾琪以從前輕言
長驅直入之說又為賊夷盜趕駝馬既恥且憤必欲
襲擊進剿勉強踐復前說若以今日之勢命伊統率

大兵直搗巢穴能保其必勝乎辦奏之事皆未妥協
大學士等將朕旨傳諭之


乙卯

命大學士等傳諭辦理軍需大臣武格馬爾泰

上諭大學士等曰陝甘二省年來辦理軍需雖皆動用
正項錢糧民間無絲毫之費然輸輓糧運伺候差徭
不無勞苦朕已降諭旨加恩獎勉但必得地方大吏
仰體朕心凡料理軍務固不可任其延緩而過於迫

急未免擾民查核錢糧固不可聽其浮銷而過於苛
刻則必致剥民督撫等大員嚴緊一分則州縣官必
於百姓加緊一倍如能寬容一分則小民必得一分
之惠武格馬爾泰二人急公之心皆切但恐諸事過
於苛迫可將朕旨傳諭凡承辦州縣或於原限之外
遲緩無多而其人之才可用者不妨姑示寬容其
開銷物料脚運之費亦必斟酌時價不可刻意核減
但此旨不可宣露於人恐有不肖之州縣借此遷延

浮冒其漸不可長也



平定準噶爾方略前編卷二十一

欽定四庫全書

史部

平定津噶爾方略前編卷三十三

詳校官監察御史

臣孫家賢

通政使司副使

臣莫瞻菴履勘

總校官進士

臣

朱 銓

校對官中書

臣

李斯咏

謄錄監生

臣

李亭植

欽定四庫全書

平定準噶爾方略前編卷二十二

雍正九年春二月戊午

訓勵軍營將士

上諭大學士等曰準噶爾父子濟惡背天逆理狡獪百端為邊方之巨患朕繼述

先志綏靖西陲特遣兩路大兵聲罪致討數年以來慎選將士輓運軍需區畫周詳備辦饒裕而三軍之氣

鼓勇直前人人思奮朕常教以古昔聖人之訓臨事而懼好謀而成天道惡盈謙沖受益軍氣當壯而軍心則不可驕此我將士及在廷臣工所共聞者也上年正月間西路大將軍岳鍾琪奏報雍正七年十二月二十八日夜巴里坤軍營有紫氣祥光綿亘東北歷四時之久光華絢爛二月間又據署總督查郎阿奏報鞏昌府屬之靖遠衛紅嘴子地方乃黃河過渡之所每年正二月間東風解凍河冰漸薄冰橋既難

行走渡船又難撐駕行李停滯歲以為常乃今年正月官運糧車至此冰忽開融舟行無阻誠從來未有之奇遇等語朕覽奏不敢遽以為喜輒行宣示於外特命封貯內閣以待大軍凱旋即此可以知朕心矣此番西路撥派之將士皆遴選訓練之精銳其氣勢倍覺壯盛遂未免有恃強輕敵之心以致賊人乘我不備侵犯汛界搶掠牧場并傷我兵弁豈軍志驕矜有干盛滿之戒

天心特以此示儆耶上年被賊侵擾之處朕與大將軍岳鍾琪等不能計慮於事先實難辭疎忽之過至於軍營牧放駝馬最宜布置有方乃以牲畜置於賊人來路之旁又與大營相隔遼遠被賊人乘機盜竊則審度形勢之謂何岳鍾琪更難辭咎又如達鼐統領噶斯之兵曾奏請製辦皮套等物以為兵丁手足禦寒之具而西路兵丁去冬出戰之時冒犯冰雪手足凍傷者多有則亦大將軍未曾留意於平時也凡此

既往之錯追悔無益從來勝負乃兵家之常禍福有倚伏之理從前因疎忽而致虧損將來自可因小警而成大功唯望合營將士等以敬慎之心辦理戎事以忠義之勇對越

上天自可仰蒙

上帝慈恩默垂保護書經云

皇天無親惟德是輔況準噶爾罄其所有甲兵不過三四萬之衆即以上年之事論之小策零數多卜係伊

防守沙喇孛勒要地之首領乃於冬間傾其人衆犯我卡倫我軍以數百人固守小營彼不能奪並不敢萌窺大營之念僅於中途以全力邀截我師四路畢集而我總兵官樊廷張元佐等以數千人擊敗彼數萬之衆則賊之力量伎倆不過如是而已蓋彼之所長在於偷盜駝馬而我師一時失於防範遂爾墮其術中並非彼之兵力有餘也觀賊之虛張聲勢分兵侵擾噶斯卡倫窺伺圖古里克之糧石我師以百餘

人即可防守而追逐之則更鼠竊狗偷之行不堪之
甚者也總之行軍之道心不可驕而氣不可餒凡我
將士務去驕矜之心而鼓將來勇敢之氣候朕徐徐
籌畫必有蕩寇萬全之勝策俾將士等歡欣鼓舞奏
凱歌而膺爵賞也其軍營得傷患病之兵丁著用心
調治務令痊可朕正籌畫加恩使之更換休養以恤
勤勞著大將軍將朕此旨通行曉諭出征將弁兵丁
知之

命加蠲西安額賦

上諭大學士等曰從來備辦軍需於地方不無勞費朕深知其弊惟恐累及民間是以於征勦準噶爾之舉悉心密籌於數年之前一絲一粟皆用公帑而民間並不知國家將有軍旅之事從來未聞預備軍需地方能如此毫不騷擾者也此天下所共知更為三秦百姓所深悉者及至大兵既出時日既多輓粟飛芻脂車秣馬雖不取辦於民財恐不免借資於民力此

亦事勢之不得不然祇以準噶爾狡獪兇頑父子濟惡實蒙古之巨患為國家之隱憂若因循苟且縱賊養奸則狡寇一日不滅邊境一日不寧即內地之民亦一日不得休息此朕熟思詳審至於再三而出於萬不容已者並非好大喜功利其民人土地而為此舉也即以上年之事言之賊夷先遣使臣詐稱求和及朕降旨暫停進兵而賊衆乘我不備大肆猖獗然則此等狡寇顧可置之度外聽其貽害於邊方哉即

此愈見

聖祖皇考當年不得已之情朕今日繼承

先志不能不辦理之苦衷也惟是國家設兵所以衛民
今因用兵而有不得不資民力之勢朕心實為憐憫
是以年來屢蠲陝甘二省額徵錢糧使羣黎均沾膏
澤而三秦紳士庶民感激國恩兼明大義踴躍趨事
志切急公二十年來如一日朕實嘉之如昨歲據督
撫奏報甘肅士民等有願捐車輛以資輓運者有願

捐草束以供芻牧者朕皆降旨一一照數給與價值
而其服勞宣力之誠悃亦大可見矣今年添辦軍需
朕又切諭督撫有司等體恤民情不得絲毫擾累其
糧餉運費特令加增倘再有不敷仍令據實陳奏無
非軫念民勞之意惟望陝甘二省紳士庶民等歡欣
鼓舞勿懈初心則和氣致祥仰邀

天眷不數年間必見膚功克奏不但邊城內外共享寧
靜之福即爾等世世子孫永保安居之樂矣查雍正

九年甘肅所屬額徵錢糧業已全行蠲免西安所屬額徵錢糧前降旨蠲免四十萬兩著再蠲免四十萬兩以昭朕體恤之恩該督撫務飭有司敬謹奉行使閭閻同受實惠併將此旨刊刻頒布俾陝甘二省遠鄉僻壤之民共知之

命免肅州安西兵應扣借支整裝銀兩並分別加賞有差

上諭大學士等曰上年臘月準噶爾侵犯卡倫署大將

軍紀成斌調取肅州安西兩路兵三千名前赴軍營
備用據署總督查郎阿奏稱兩路弁兵起程時衣裝
之費分別借給銀兩俟將來按數扣除朕思準噶爾
之事起於倉猝兩路弁兵於盛寒冬月前赴軍營日
期忙迫深可軫念所借銀兩悉著賞給不必扣除並
將該弁兵分別加賞銀兩著大將軍傳問伊等或本
人在軍營自領或其眷屬在家支領悉從其便

壬戌

命代西路有功將士並增設四川總督

上諭大學士等曰國家教養將士加恩於平時原欲其有勇知方緩急可恃以備干城之選果能臨戎遇敵奮勇先登勞績戰功卓然可紀尤當沛以殊恩優加體卹以獎忠誠而褒壯略也上年冬底準噶爾之事總兵官樊廷等已頒諭旨厚加爵賞并令戰陣有功之弁兵更換休息中有侵冒冰雪觸犯鋒鏑而損傷手足者令軍營加意調治送回本汛矣著大將軍岳

鍾琪將此次隨樊廷張朝良等禦賊有功之將弁兵
丁皆一一查明應令各回本任本汛者著另選撥以
代之朕又思川陝二省地方數千里甚為遼濶今西
邊有辦理軍需之事總督一員難於控制向來川省
曾設總督今仍著添設四川總督一員即以提督黃
廷桂補授四川提督著陝西固原提督紀成斌調補
陝西固原提督著陝西肅州總兵官樊廷陞授陝西
肅州總兵官著四川重慶總兵官張朝良調補四川

重慶總兵官著江南漕標副將馬義陞授俟石雲倬馬紀勲等到軍營之後樊廷等各回新任紀成斌未回四川之先其提督印務仍著黃廷桂兼管

癸亥

命揀選八旗家人為家選兵赴軍營備用

上諭八旗大臣等曰滿洲蒙古漢軍及包衣佐領下家人內有漢仗好行走歷練能受辛苦且長於鳥鎗弓箭者著揀選二千名發往西路軍營備用此挑選時

聽伊等家主及本身情願入選者即著賞本主銀一百兩伊等凱旋之日俱准為另戶再每口賞伊本主銀一百兩至伊等前往軍營一切錢糧馬匹器械銀兩等項著照馬甲之例另行賞給

三月甲子朔

訓勵喀爾喀王貝勒等

上諭喀爾喀王貝勒等曰爾喀爾喀原係大部落因爾等先世但知好佛誦經廢弛戎務曾被噶爾丹戰敗

爾等受

聖祖仁皇帝恩養教訓四五十年練習武藝非比從前
之怯懦去歲準噶爾賊人乘西路軍營不備盜竊馬
匹總兵官樊廷等率衆二千救援卡倫與二萬賊兵
交戰殺賊甚多旋即遁歸倘賊人入爾等游牧之地
爾等當乘時努力報恩雪恥朕遣兵進剿準噶爾原
非利其土地人民特為爾等不能安寧之故耳其深
悉朕意各加奮勉毋忽

乙丑

命左副都御史二格協辦肅州軍需事務

丙寅

以寧遠大將軍岳鍾琪摺奏軍營事宜有

旨宣諭大學士等

上諭曰寧遠大將軍岳鍾琪先後接到所降諭旨辦理
諸務雖較之從前所奏略有頭緒而中間尚有錯謬
之處如將肅州駐劄之固原寧夏兵丁二千五百名

撥到軍營者原以補缺少原額也又奏稱將此二千五百名與撥出口之西安兵一十名涼州兵五百名駐劄圖古里克摩垓圖等處若北路一有調遣即將此兵丁從庫克托木一路赴阿濟卡倫應援如四千名尚不敷用再於軍營內挑選精兵四千名於喀喇烏蘇直赴必濟卡倫應援等語北路滿漢兵丁及察哈爾等處兵丁三萬餘名加以喀爾喀數萬之衆豈有尚資藉於西路應援之理設賊人果傾其全衆犯

我北路則西路之師自應直向木魯河賊人留駐之所及伊勒布爾和碩放卡之處搶擄其牲畜勦滅其人衆又何暇分其兵衆以作應援之師乎且阿濟必濟去北路大軍之營尚遠賊人豈能越我軍營而至而勞西路應援之兵乎此等設施實未妥協至請將滿洲歸化城兵丁交與常賚帶領至安西駐劄與朕意相符及將圖古里克糧石運交軍營收貯所議亦為允協應照所請行

戊辰

命西路軍營嚴設防範並詳議補撥兵額事宜

上諭大學士等曰準噶爾賊人留守駐防木魯河又於伊勒布爾和碩安設卡倫雖聲言欲犯北路朕料其詭計仍欲來犯西路也藍生芝之脫回未必非賊之故縱令其傳述此信以懈我西路防範之心爾等可傳諭岳鍾琪不可稍存輕忽之心賊夷率衆來犯如為數無多西路之師固足抵禦勦戮即傾衆而來亦

不可即調北路之兵恐賊兵復以大隊犯北路北路兵力不分方可全力擊勦至西路軍營現今兵馬果否敷用亦應詳審確實無致臨時周章又補撥兵丁原額或用本省之兵或用鄰省之兵或行召募令岳鍾琪詳議具奏

乙亥

訓飭寧遠大將軍岳鍾琪等

上諭大學士等曰寧遠大將軍岳鍾琪署總督查郎阿

因聞賊營脫回兵丁藍生芝傳說噶爾丹策零帶領
部落家口移住哈喇沙爾并有四月初一日小策零
敦多卜會兵去犯北路之言籌畫四條具奏隨傳問
多爾濟波羅特據稱哈喇沙爾係回子所住耕種之
處相近有小城名庫爾勒其地氣候炎熱又甚隘小
僅可容千餘家四面係開種田畝不能收放多爾濟
在哈喇沙爾居住最久波羅特亦親聽彼地人傳說
二人之言的確與否雖未可必然大約其地之不甚

寬大可知噶爾丹策零若欲移駐於此必率其全部而來少亦一二萬人哈喇沙爾果能容此大衆乎且以情理論之伊犁為賊之巢穴西北與土爾扈特哈薩克接境實皆賊之讐國噶爾丹策零又安敢舍其巢穴而遠居於哈喇沙爾乎如果率其大隊住於吐魯番相近之處則賊之注意在我巴里坤軍營而岳鍾琪乃云賊人由吐魯番一路直侵哈密截我營站乘勢侵擾安西肅州沿邊一帶等語據多爾濟博羅

特俱云哈喇沙爾至吐魯番雖有路徑皆係沙磧其
自吐魯番至哈密一由沙磧大隊難行一沿南山係
一線細路又須仍從巴里坤經過然後得達二人之
言果確則賊衆不能從哈喇沙爾直至吐魯番而吐
魯番一路不能直侵哈密也明矣設賊人欲侵犯哈
密巴里坤大營之大軍豈竟任其出入而令阻截臺
站乘勢侵擾安西肅州乎至云賊人以大隊全赴西
路攻我軍營賊勢甚衆我軍衆寡莫敵當持重戒嚴

堅壁固守一面知會北路遣兵應援一面飛調綠旗
滿洲蒙古兵丁由烏克克嶺三面夾擊等語從前事
起倉猝彼時軍營兵馬無幾是以諭令岳鍾琪倘賊
夷以大隊再犯當持重堅守以待應援今則軍營現
在馬步車兵約有一萬九千餘名加以安西甘肅之
兵六千名續派兵四千名共二萬九千名是兵不為
寡矣夫樊廷以馬步二千敵彼二萬轉戰七晝夜猶
足以相當乃以二萬九千人之衆而云衆寡莫敵何

懦怯至此且從前尚欲直至伊犁搗其巢穴豈有賊人來至數百里內而無勦殺之策轉堅壁而不出乎獨不思我軍堅壁不出倘賊但虛張聲勢作攻我軍之狀而分其衆以侵擾圖古里克塔勒納沁哈密等處阻截營站斷我音問此時將任賊於軍營近地肆行無忌乎岳鍾琪又欲以圖古里克摩垓圖及安西之滿洲蒙古官兵由烏克克嶺合會夾擊賊人若果至巴里坤賊即敗逃亦從科舍圖一路直走伊勒布

爾和碩而遁烏克克嶺相去二三百里安所得夾擊之又云賊夷或令積木薩之兵侵犯軍營而以哈喇沙爾之賊侵犯青海查哈喇沙爾至青海必由噶斯噶斯之口甚隘斷不能行且賊人既遣人侵犯大營彼豈不慮我軍之勦殺自必留哈喇沙爾之衆以為應援又何敢分其衆侵犯青海乎至慮賊之率其醜類悉赴沙州等處尤為背謬賊若由噶斯伊遜策罕齊老圖而進則此數路斷難容走萬餘人若由大道

而來又不知何法可以越我巴里坤軍營而過也岳
鍾琪於口外地方形勢茫然不知於軍務機宜亦覺
昏憤凡巴里坤軍營築城之要策及大軍勦賊之勝
算並未籌及而但將旁枝末節盈篇累牘備極周詳
朕披覽之下實為煩憂如藍生芝所聞賊人有搶卡
倫牲畜踐踏禾苗之語不思賊人若來搶奪我卡倫
牲畜我獨不能勦戮此搶奪之賊乎賊人可以踐我
禾苗我不可以乘其踐踏而擒之乎岳鍾琪何以但

能慮賊而不知籌已也又藍生芝云有哈密回子報
信領路等語哈密回子之不可信由來已久亦當諒
其苦情蓋其力量微弱遭準噶爾之凌虐恨之入骨
而畏之如虎其或偶然通信於賊者乃恐懼之至為
將來自全之計我軍固不可不留意隄防然不可使
彼有疑懼之心我之軍力能庇護哈密哈密自不為
賊人所用岳鍾琪不必因藍生芝之言而深究也至
西鳳二府運糧一事原因軫念甘肅連年輓運軍糈

民間不無煩擾是以特命范時繹到彼協同巡撫武
格侍郎馬爾泰將西安鳳翔二府米石運至甘肅涼
州以資軍食武格等議行本運之法俾西鳳二府官
民任轉運之勞甘肅地方少得息肩朕意深以為然
今岳鍾琪查郎阿又為遞運之議是與雍正元年設
臺盤運相同將來必有派撥協濟之累或更以交接
卸責至將米石灌水攪沙從前誤累豈可復蹈爾等
可傳諭岳鍾琪等知之

壬午

諭吐魯番回人移居近地

上諭大學士等曰紀成斌聞賊人侵擾吐魯番之信即
令樊廷等領兵四千前往應援此舉甚屬錯謬朕已
降旨嚴切申飭至於從前採買吐魯番糧石本應給
與運價令其自送軍營乃計不出此而遣官發駝遠
行搬運致啟賊人偷盜之心及至去冬逆夷猖獗之
後猶不將辦糧之弁兵撤回此則疎忽錯誤之甚者

也惟是朕以怙冒萬方為心若坐視吐魯番之被寇
侵凌而不為之籌畫保護朕心又有所不忍從前曾
降旨與吐魯番人眾若畏懼準噶爾即移向近邊之
地居住是以托克托瑪木特帶領之人移駐近邊者
皆享安寧之福可再行曉諭回子等伊等倘自揣力
不能敵不妨仍為移避之計朕當從厚賞給盤費並
令地方官善為安插使之得所若此番曉諭之後伊
等仍復觀望則賊人再來侵擾之時聽伊等自為之

計我軍不便護庇矣

甲申

築科卜多城

靖邊大將軍傅爾丹奏言北路軍營遵

旨築城審度形勢科卜多地接布魯爾與庫列圖相近
乃進兵大道請於此築城為宜大學士等議覆
應如所請奏入

上從之

丁亥

命各省督撫募選技勇送部訓練備用

上諭大學士等曰各省督撫著於所屬地方民人內召募揀選人材壯健技勇可觀者百餘人咨送兵部奏聞候朕揀派官員訓練教習以備軍旅之用武生武童及鄉勇民壯等俱可入選每人本籍額外給與守糧一分以養贍其家口本人進京之時著督撫動支公用銀兩賞給路費

戊子

命伊禮布率家選等兵赴西路軍營

上諭大學士等曰都統伊禮布著帶領家選兵二千名
驍勇兵一百名前往西路為副將軍若大將軍岳鍾
琪有統兵行走之處著伊禮布帶領滿洲兵丁一同
前往其分管家選兵護軍校延岱等二十員各賞銀
五百兩

己丑

選巴爾虎護軍等兵赴巴里坤

上諭大學士等曰察哈爾地方居住之巴爾虎護軍披甲人等內著挑選一百名巴爾虎侍衛岱噶爾那木扎爾鄂欽敦柱克亦著派出此一百名兵丁令侍衛岱噶爾會同該總管詳加揀看其馬匹行糧照例辦理支給外侍衛四員各賞銀五百兩兵丁一百名各賞銀一百兩令其收拾預備俟京師兵丁定有起程日期即行文知會岱噶爾等帶領前往鄂爾多斯地

方等候副將軍伊禮布領兵到時著伊禮布一併管轄帶往巴里坤軍營若有行走之處著於彼處所有歸化城一千兵內殘弱者撥出百名存留營內將此一百名入於歸化城兵丁數內令其防範盜竊馬匹等事俟成功之時著侍衛岱噶爾各帶回本處

庚寅

上諭大學士等曰何祥書著赴北路軍營令大將軍傅爾丹酌量給與綠旗職銜管理九十車騎兵効力行

走

四月庚子

命左都御史史貽直等往陝西宣諭化導
上諭內閣曰朕御極以來繼述

皇考聖祖仁皇帝乂安區宇之

聖心宵衣旰食朝乾夕惕欲使薄海內外休養生息物
阜民安永戢兵戈咸登衽席以成蕩平熙皞之治是
以宣猷敷治之間宏綱庶務凡有益於民生者莫不

興舉不便於民生者莫不屏除若有幾微措置失宜
即五內展轉寤寐難安豈肯好大喜功興兵構難使
百姓有供應之勞不遑寧處哉惟是鋤暴乃所以安
民撫內必兼乎攘外此古今不易之至理帝王治世
之常經凡爾百姓麤通大義者即莫不知之不必待
高遠之識也惟是準噶爾一部落原係元朝之臣僕
其始祖曰額森額森之子托琿漸至大員因擾亂元
之宗族離間蒙古惟恐獲罪遂背負元朝之恩逃遁

藏匿於西北邊遠之地煽惑匪類要結黨與自稱準噶爾當我朝定鼎之初各處蒙古傾心歸順求為屬國獨準噶爾一部落違越於德化之外至噶爾丹策妄阿喇布坦二人則尤狡獪兇頑之甚者噶爾丹身為喇嘛不守清規不遵佛教破戒還俗娶青海鄂齊爾圖車臣汗之女為妻又潛往青海地方賊害伊之妻父而虜其人衆又復巧構釁隙乘喀爾喀之不備發兵猝擊以致喀爾喀人衆潰散紛紛投我天朝蒙

聖祖仁皇帝施恩撫恤遣使前往噶爾丹處諭令戢兵
和好多方開導乃噶爾丹冥頑不靈轉借追襲喀爾
喀之名犯我邊汎彼時即行勦滅復有何難我

聖祖仁皇帝至仁如天好生為德特遣官員前往責問
是時噶爾丹惶愧恐懼設誓撤兵仍復潛住近邊暗
圖窺伺且乘間搶掠蒙古牲畜俾其不獲安居我

聖祖仁皇帝始親統六師躬行天討噶爾丹逆天背理
自速滅亡此噶爾丹之始末也策妄阿喇布坦者乃

噶爾丹之姪也彼時既平噶爾丹即可鋤絕根株不留餘孽祇因我

聖祖仁皇帝寬大慈仁赦罪宥過且念策妄阿喇布坦素與伊叔不相和睦情有可原於是加以

天高地厚之恩將噶爾丹餘剩部落賞伊收管此時伊力弱勢微甚為恭順其後則離間伊妻之父子誘其妻弟攜帶萬餘戶至伊住牧之地因而強占入已由是勢力漸增竟敢肆意妄行窺伺青海侵犯哈密又

潛兵入藏殺害伊妻弟拉藏汗毀壞寺廟荼毒人民
我

聖祖仁皇帝特遣大臣前往詢問乃伊愍不畏死阻兵
抗命因使臣率師甚少兵力單弱伊得肆其猖狂此
實天下臣民所共憤者我

聖祖仁皇帝仍賜包容諭令兩路官兵姑緩前進以俟
其悔罪輸誠若怙終不悛則命將徂征犁庭掃漠此
我

皇考之本意也朕即位以來伊雖遣使求和而詐偽作
奸仍復如故且將我青海叛臣羅卜藏丹津收留藏
匿朕屢次降旨諭以定界息兵而伊狡飾支吾巧幻
百出及策妄阿喇布坦身故伊子噶爾丹策零繼立
其妄亂之性狂悖之行更過於其父其遣使陳奏之
詞甚屬支離妄誕即如前年西藏阿爾布巴等之戕
害康濟鼐亦因與準噶爾地方相近而逃匿之羅卜
藏丹津又係伊等姻戚彼此相依是以敢於悖逆朝

命而仗準噶爾以為狡兔之三窟也似此世濟其惡
之人以逞兇挾詐為心以劫物傷人為事不可以德
感不可以理喻無賴無恥藏慝藏奸時時欲戕害臣
服我朝之蒙古部落以壞我屏垣若當此可以經理
之會而瞻顧因循避興師動衆之名為耽逸偷安之
計將狡寇一日不滅則蒙古一日不安邊境一日不
寧內地之民一日不得休息而首先疲於奔命者即
三秦之黎庶也即以上年之事論之賊夷先遣使臣

偽稱請和及朕降旨停兵以待信息而彼於深冬冰雪之時傾其醜類乘我不備侵犯汎界盜竊駝馬然則此等狡寇固可置之度外聽其貽害於將來乎從來窮兵黷武為聖帝明王之所深戒而以大加小以強凌弱又仁人君子之所不忍為者況準噶爾彈丸之地遠在極北之區得其地不足以耕耘得其民不足以驅使即使滅此朝食亦不足以誇廟略而耀武功此皆

皇考與朕熟思審處先後籌畫數十年而出於萬不得已者也惟是地方有軍旅之事厲兵秣馬諸務紛繁雖不取辦於民財恐不免借資於民力向蒙

皇考軫念秦民勞勩所以加恩而優恤之者無待朕之縷述矣朕御極之元年即將陝甘二省康熙六十年以前民屯衛所未完銀米豆草等項悉行蠲免又將舊例應完之三釐三合免其徵收數年以來西安所屬額徵錢糧或免四十萬或免八十萬甘肅所屬錢

糧則連歲全行輟免他如展納課之定期寬帶徵之舊欠開墾地畝修築河渠悉動帑金永為民利此皆朕之加惠於秦民者可約略舉之也即以西陲用兵之事言之北路軍需交與怡賢親王等辦理西路軍需交與大將軍岳鍾琪辦理皆定議於雍正四年者王大臣等密奉指示一絲一粟皆用公帑製備纖毫
不取給於民間是以經理數年而內外臣民並不知
國家將有用兵之舉及至雍正七年大軍將發飛芻

輓粟始有動用民力之時朕皆敕令地方有司照數
給與腳價嚴禁剋扣短發侵蝕等弊倘有不肖官員
借稱軍需科派擾民者著該管大臣即行題叅革職
先動帑金傳集百姓如數給還朕所以為百姓防患
除弊者亦極嚴切矣上年該督撫先後奏稱民人中
有願捐草束以供牧養者紳衿士庶中有願捐車輛
以資輓運者朕皆獎以溫諭仍令照數給與價值去
冬賊夷猖獗之後將來軍餉較前未免繁多又特加

添運價一切軍務悉令有司寬裕辦理朕豈肯因戎
事緊急稍涉權宜使閭閻騷擾於萬一哉意謂三秦
衆庶必能諒朕不得已而用兵之苦心悉朕不忍累
民之至意矣乃近來風聞陝西之民竟有怨朕而私
相謗議者總因十數年來陝西居住之允禔塞思黑
年羹堯延信等皆懷挾異志包藏禍心其脅從之黨
實繁有徒如塞思黑之令狐士儀年羹堯之鄒魯淨
一道人延信之道姑王氏等皆公然以反叛為衆人

之倡則其他匪類之造作妖言暗中煽動者又不知其幾矣地方既有奸回之人而又值軍興旁午或有司自顧考成間有奉行不善之處是以愚民無知惑於邪說溺於私情偶因用力於目前遂忘受恩於平日此亦事勢之所不免者夫秦風樸直自古為然樸則易被人欺直則善言易入祇以向來未有宣諭化導之人而該省督撫以及有司既有刑名錢穀之專責又有徵兵籌餉之軍需簿書鞅掌難於兼顧是以

準噶爾之始末邊防關係之情形

皇考與朕奉

天討罪除暴安民萬不得已之苦衷並未家喻而戶曉
但聽僉邪小人搖唇鼓舌訕謗朝政變亂是非無怪
乎草野之中被其迷惑者不少也今朕特頒此旨遣
左都御史史貽直侍郎杭奕祿署內務府總管鄭禪
寶率領翰林院庶吉士及六部學習人員國子監肄
業之選拔貢生等前往陝甘二省開導訓諭覺悟愚

蒙倘合省民人等果能篤尊君親上之義消亢戾怨
懟之情將見和氣致祥必邀

上天默佑迅奏膚功邊塞永寧烽烟屏息不但爾等安
居樂業俯仰優游即爾等世子孫共享昇平之樂
矣至於軍需各項悉動帑金差員辦理不得扣剋短
少貽累小民所降諭旨至再至三著欽差大臣悉心
訪察倘有不遵諭旨即行題叅或所定官價有不敷
用之處亦即據實奏聞若兵馬經過之地有不遵紀

律騷擾民間者小過即告知該管大臣懲治大過即
行叅奏不得姑容務使兵民和洽內外輯寧以迓

天庥以副朕念

平定準噶爾方略前編卷二十二

欽定四庫全書

平定準噶爾方略前編卷二十三

雍正九年夏四月丙午

命范時捷協辦西寧總兵官事務

上諭兵部曰提督馮允中熟悉邊情老成練達但聞近患目疾行走須人扶掖於訓練操防稍覺未便西寧一鎮關係緊要其總兵官事務著德成協同辦理陝西固原提督樊廷現在軍前已降旨令回固原之任

俟樊廷到任後著署陝西固原提督范時捷協同馮允中辦理陝西西寧總兵官事務

丁未

諭宣諭化導官

上諭內閣曰連年用兵邊塞輓粟飛芻不無資於民力之處而草野之間不知軍國邊防之重寄朝廷萬不得已之苦心溺於私情妄生疑議是以特遣大臣官員前往秦省宣諭化導務使僻壤遐陬家喻戶曉不

可視為具文潦草塞責更不可指稱公事派累地方
倘奉行不力而轉令地方有供應之繁是朕之遣官
非所以安之乃適以擾之也欽差大臣等已給與驛
馬廩給其分派之官員等皆厚給公帑以為僕從車
馬館餐行李之資所到地方一絲一粟不許索取該
有司亦不許應付餽送倘有不遵朕旨者與受同罪
決不姑貸若差徃之官員等有生事滋擾而總理大
臣失於覺察者朕將於大臣是問倘地方辦理軍需

有騷擾民間而差徃之大臣官員知而隱匿者別經發覺朕於欽差之大臣官員是問將此旨通行曉諭知之

庚申

停運黑茶并加恤効力官

上諭大學士等曰上年大將軍岳鍾琪在京時條議進兵事宜令河南採辦黑茶三萬五千封解送西安交與巡撫武格送至巴里坤軍營以備進兵賞賚之用

今大將軍既停進發則茶封非所急需聞武格等以未奉部文停止仍委人員運送軍營似此不急之務徒多勞費著即行文前去暫行停止又今春命往陝甘効力人員若在內地差遣其力量尚可自備資斧聞武格將伊等派往巴里坤軍營亦令自出盤費並無幫貼恐微員等力量不敷有誤公事一并傳諭辦理軍需大臣等知之

五月癸亥朔

安輯青海公拉察卜等

上諭大學士等曰據殷扎納達鼐德成馮允中等先後奏稱青海居住之公拉察卜台吉察罕喇卜坦從索羅木過黃河移往他處居住又聞戴青和碩齊察罕丹津亦往他處遷移不在海流圖地方住牧因撥派兵丁官買馬羊辦理之人不甚妥協伊等暫行躲避等語朕因上年準噶爾乘我西路軍營不曾防備傾其醜類盜竊駝馬因念青海各扎薩克人衆恐遭逆

賊侵害是以諭令派出兵丁為防護之計每名賞給銀兩為衣裝之用其諭令採買馬羊者原欲使伊等所有牲畜得變價值可獲利益並非大兵需此些微之助也前殷扎納赴西寧時朕面加訓誨一切派兵採買之事悉聽衆蒙古之便不可絲毫勉強並慮蒙古王台吉科派所屬之人諭令嚴行禁約豈肯令差往之人逼迫蒙古以從事乎令拉察卜等無故遷移他往其中自有情由必係殷扎納等不能宣揚朕諭

使衆心共曉而採買馬羊又不聽從其便以致拉察
卜等心懷疑畏暫避差徭雖拉察卜等甚屬孟浪糊
塗亦殷扎納等奉行不善之所致也今特頒諭旨曉
諭拉察卜等令其速回本處並將隱情據實陳奏再
傳諭德成達鼐馮允中等令其明白開導善為安輯
並將伊等如何疑畏遷移之處查明具奏其餘地方
事宜俟侍郎衆佛保去時再行詳諭

甲子

命鎮安將軍常賚率兵赴安西駐劄授石雲倬為西路

副將軍赴軍營

命給張家口營兵月餉

上諭兵部曰今歲命往陝西西安駐防兵丁派出直隸張家口營兵一百八十餘名聞各兵家口支領錢糧而該管武弁等以各兵應有錢糧俱給與新募之兵支領無可給發以致各兵家口三月未曾領餉日食不敷四路奔訴凡兵丁撥派他往者如馬兵一名原

領月餉二兩則以九錢付本兵為途中鹽菜之用以一兩一錢為養贍家口之資所有兵米亦仍令其家口支領若有新募兵丁則另行給與月餉並無以本兵錢糧付新募兵丁之事何以張家口官弁等錯誤遲延以致各兵家口糊口無資著該督該提鎮即速查明照例給發並將遲誤之處據實叅奏

加恩山西駐防効力丁壯

山西巡撫覺羅石麟疏言太原駐防兵五百撥

往西寧三百其留營者不足以供調遣據各旗間散丁壯塞爾泰等呈言自祖父以來受

國家養深恩願不領錢糧當差効力臣即選得年力强壯技勇可觀者百人令其給役俟兵丁缺出選補奏入得

旨太原各旗間散丁壯等既令當差學習行走自當酌加恩澤以示鼓勵著每名月給銀一兩米三斗以資其食用該撫石麟時加教訓務令勤謹効力黽勉向

上若有名糧缺出即將伊等揀選頂補以副朕教養
兵丁之至意

丙寅

上諭兵部曰樊廷從軍營進口著即赴陝西固原提督
之任范時捷著仍留固原俟立秋以後樊廷乘驛來
京陛見其提督印務仍著范時捷署理俟樊廷回任
後范時捷再往西寧協辦總兵官事務

命加一等侍衛阿成阿副都統銜轄家選兵二千赴西

路軍營

丁卯

命巴爾虎等兵由古爾班賽堪赴巴里坤

上諭大學士等曰巴爾虎兵丁一百名前赴巴里坤軍營由古爾班賽堪行走路近而水草好著由此路前往所派兵丁先令於鑲藍旗察哈爾地方齊集俟阿敏道噶扎爾圖到時帶領起行京城所選驍勇兵一百名亦著由此路前往

戊辰

命籌援勦事宜

上諭大學士等曰今年三月間準噶爾賊人侵擾吐魯番紀成斌聞信即令樊廷等領兵前往應援此舉實欠詳審蓋賊人之意原欲疲勞我士馬故為此出沒詭計耳彼時朕閱紀成斌之奏即降旨切加申飭越數日岳鍾琪奏到其所見與朕意相同又越數日紀成斌奏到知賊人未見我師果已潛遁無蹤矣賊之

狡獪如此是以朕諭令吐魯番人衆商酌遷移暫避
之計蓋欲善為保全之以俟大軍凱旋共享昇平之
福也今據大將軍岳鍾琪奏報賊人於四月間又復
侵犯吐魯番額敏和卓求請應援大營未曾發兵前
往大將軍辦理甚是但朕細思之賊人若仍以千餘
人騷擾吐魯番則彼地城垣兵力足以捍禦倘復增
添賊衆吐魯番力不能支朕心有所不忍況伊等前
次感恩望濟之言甚為懇切朕又有令其遷移暫避

之旨料賊人必知信息倘乘其遷移之隙而侵害搶掠之是吐魯番之人因遵旨而受累尤朕所惻然者也可傳諭岳鍾琪令其確探賊耗衆寡若何情形若何久暫若何其應否應援之處酌量變通辦理不必拘執前說至於賊兵引去後吐魯番回子有情願遷移者又應如何沿途防護不受賊人劫奪侵凌之處著大將軍留心經理

辛未

命通政使趙之垣等籌運進兵糧餉

上諭內閣曰用兵以籌餉為先而輓運以得人為要果得其人則民力不致煩勞國帑不致糜費而兵食饒足士飽馬騰其裨益於公事良非淺鮮也年來西北兩路用兵籌餉事宜朕心甚費區畫北路軍糧范毓麟承領運送諸事諳練措置得宜朕深嘉獎已加優敘西路軍糧向來俱係官運今行之日久難保無侵帑累民之處因思通政使趙之垣副將馬龍乃三秦

世族且官至大員於本地土俗民情素所熟悉若照范毓麟之例領取帑銀轉輸輓運似屬可行之事朕將此詢問趙之垣據稱情願効力查內地軍糧運送巴里坤軍營者年來經理已有頭緒但自軍營進剿之糧尚無轉運之善策著趙之垣前赴軍營與馬龍公同商酌如何運送之法聽其自行定議酌量舉行每石運價若干朕悉照數給與不令絲毫賠墊但不可有浮冒侵蝕之弊總與地方有司毫無干涉其間

遲速機宜及道途防護等情則與大將軍該督撫等
計議而行俟趙之垣到彼與馬龍商酌定議果能承
領辦理具奏到日給與欽差關防

士申

定鎮安將軍常賚及歸化城兵至營日期

上諭大學士等曰鎮安將軍常賚著從安西前赴軍營
與大將軍岳鍾琪副將軍石雲倬等計議進兵事宜
但聞賊人有窺伺洮賚卡倫之信常賚前赴大營時

途次須小心防範或帶兵丁數百名護送或探聽賊人遠遁之後再行前往務慎重妥貼總以七月初旬至營為期其現在甘涼歇息之歸化城蒙古兵一千名已有旨令其前赴軍營備用可令原管領之都統根敦等帶領出口務於七月初旬到營可傳諭查郎阿等並常賚知之

癸酉

上諭大學士等曰任國榮仍帶總兵銜前往北路軍營

管理車騎兵兼司屯種事務著大將軍傅爾丹酌量
派委照總兵官胡傑之例行走

乙亥

命預防賊人騷擾噶斯窺伺青海事宜

上諭大學士等曰從前三月間賊衆有二千餘人來吐
魯番見我兵前往應援賊兵即先行潛遁今據大將
軍岳鍾琪奏報四月間又有賊千餘來擾吐魯番并
有二百餘人犯我洮賚卡倫等語朕看此情形或者

將來賊人由哈喇沙爾前往噶斯地方又如上年故
智暗行騷擾或增添人衆窺伺青海亦未可定格默
爾等所統兵力未免稍單朕前次曾有不應調撥西
寧兵丁之旨若此時有應用添兵之處恐格默爾等
亦不敢調取德成亦不敢派撥可傳諭德成達鼐馮
允中管承澤格默爾鼐滿岱福寧等從前所以不令
調撥兵丁者蓋西寧軍務尚未就緒自以固守根本
為是今西寧布置已定兵力有餘若賊人窺伺噶斯

自宜發兵應援況目前青海蒙古兵丁尚未攢集齊全即器械等件亦未周備難以望其捍禦賊鋒亦賴官兵為之保護著德成等就近酌量倘有用兵之處或著管承澤鼐滿岱帶領前往或德成另議一二人前往至官兵派出之後遇有本地添兵防守之處即將土兵派出此旨著德成並諭衆佛保殷扎納知之命山東登州總兵官岳含奇率湖廣兵赴西安

上諭兵部曰山東兗州總兵官岳含奇著調補山東登

州總兵官前降諭旨令湖廣預備兵丁二千名聽候
西路調撥之用著岳含奇前往湖廣會同總督邁柱
加意挑選人材壯健技勇優長者二千名即令岳含
奇帶領前赴西安駐劄其領兵之副叅遊守千把等
官亦著邁柱岳含奇揀選前往此所派兵丁內將長
於藤牌者挑選五百名或一千名充入二千名之數
若弁兵內有人材可用情願赴軍前効力者亦著邁
柱岳含奇酌量派用此二千兵丁於秋末冬初候旨

從湖廣起身一應賞賚銀兩照例給與

已卯

命卹賞西路千總馬建功等

上諭大學士等曰西路軍營千總馬建功奉差探聽賊兵信息帶領兵丁十人前往因人少力單遇賊被害並傷兵丁石玉張秀閻得三人深可憫惻馬建功等俱照陣亡之例加恩卹賞

定西路軍營安設卡倫撥用蒙古兵事宜

寧遠大將軍岳鍾琪奏言賊夷出沒不常散設
卡倫轉滋覬覦今於鏡兒泉設三大卡倫并撥
兵丁登山瞭望復於途次五里一置塘站直接
軍營一遇緊急接遞傳報奏入得

旨賊夷既施鬼域之技出沒紛擾意欲疲我士馬並使
軍營馬匹不得收放自當計議防範擒勦之策今安
設大卡倫三處固是但此數千弁兵馬匹如何收放
看管可免賊人窺伺又三大卡倫之外尚設小卡倫

否若於賊之來路設小卡倫仍屬照前而更多一番
防備恐兵少力單難於捍禦若不設小卡倫則賊之
來蹤日間可以登高瞭望昏夜則如之何又不知此
三大卡倫果能全堵賊之來路俾必不能近我軍營
窺我牧場否倘乘小卡倫撤回之後越大卡倫擾我
沿路塘站不可不防至於阿寶所領鄂爾多斯兵丁
從前派往軍營者原令專司牧放之事乃大將軍等
將伊等分散派守各處卡倫伊與綠旗兵丁等言語

不通徒彼此推諉甚屬無益嗣後蒙古兵丁不可以
此零星派用

庚辰

命察劾管理內地回民各官

上諭內閣曰從前因準噶爾之肆虐吐魯番回民畏其
侵凌有情願移居內地者諭令地方有司善為安插
撫綏使之寬裕從容得所項聞在肅州居住之回民
等田瘠水少收成歉薄而所有牲畜亦不敷用生計

未免艱難此皆經管之員辦理疎忽而該省大臣失
於覺察之所致也著署總督查郎阿將從前辦理不
善之員查出題叅其有應行加恩撫恤之處亦著查
郎阿酌定請旨即將此曉諭吐魯番移住內地之回
民知之

甲申

賞敘臺站官役

上諭內閣曰西路軍營臺站自上年十二月以來往來

文移繁劇長途遞送從無遲誤該管臺站官弁實心
供職其在塘夫役人等効力亦屬勤勞著交與辦理
軍務之署陝西總督查郎阿將京城至軍營一路兵
臺官役等分別內地外邊加恩給與議敘賞賚

六月甲午

命籌應援吐魯番進勦準噶爾事宜

上諭大學士等曰寧遠大將軍岳鍾琪摺奏準噶爾賊
衆二千餘人圍困魯克察克之城晝夜攻打二十餘

日吐魯番回子奮勇出擊殺死逆賊二百餘人帶傷之賊甚多請以三千勁兵兼程而進必獲全勝將來即以此三千兵丁駐劄吐魯番合之回民足備防禦等語朕前次聞吐魯番回民等感恩望濟之言甚為懇切恐賊衆再以大力侵凌伊等不能抵敵為其所困已降旨令大將軍岳鍾琪酌量發兵應援不必拘執前說今岳鍾琪具奏之日尚未接到朕旨是以仍作游移之詞凡用兵之道在於隨機應變不容刻緩

若果岳鍾琪確有所見即應遣兵速往一面奏聞何
必待降旨到日始遣兵前往乎又奏稱挑選精兵三
千名駐劄吐魯番外餘剩壯健兵丁留駐新城防守
儘足備進擊烏魯木齊之數等語朕思我兵進擊烏
魯木齊之時若有賊衆繞道侵犯新城當思應援勦
殺豈可但作防守之計至於此時應援吐魯番自屬
應行之事但噶爾丹策零性情躁妄此次失利之後
或於冬季多添兵力攻擾吐魯番未知我三千兵丁

合之回子之力便可以從容捍禦否且我軍既駐劄吐魯番則將來不得不時為應援岳鍾琪從前曾有吐魯番駐兵數萬之奏若此時駐兵三千將來因此牽制有不得不加增之勢此則舍本逐末必不可行者也朕又思吐魯番乃阿爾輝哈喇沙爾兩路之關鍵既有我軍駐劄則將來築城於烏魯木齊時呼吸相應賊人不敢繞襲我軍之後况我軍正欲進攻賊之巢穴若賊人果以大衆來犯吐魯番則我軍不勞

遠行可以就近殄滅之亦是善策總在岳鍾琪悉心籌畫務期萬全若將大營兵丁三千名派往吐魯番則此三千之數當另行撥派以足額吐魯番地方難於多養馬匹況此三千兵丁乃為防守之用非為追擊之用所帶馬匹可酌量存留其餘仍遣回大營牧放至於礮火鉛彈多帶備用上年官買吐魯番糧石不必運送軍營即著留貯吐魯番以備大兵之用吐魯番回目額敏和卓等誠心向化盡力擊賊甚屬可

嘉著大將軍傳旨獎勞酌量賞給緞疋銀兩茶葉等項彼地既遭賊人侵害恐收成歉薄糧食不敷著即以官買糧石酌量賞給務使回民得所將此詳悉傳諭大將軍岳鍾琪知之

乙未

命贈賞河州副將馬雲

上諭大學士等曰河州副將馬雲於上年冬月在北山領兵敗賊著有勞績今聞病逝著加總兵官銜賞銀

一千兩為歸櫬之費

庚子

寧遠大將軍岳鍾琪請援吐魯番

上飭諭之

岳鍾琪疏言賊圍吐魯番臣選馬兵三千令張元佐曹勦張存孝統之於四月二十四日進發又令顏清如率兵二千往駐塔庫又撥兵四千令紀成斌率往洮賚要隘駐劄倘賊人傾衆而

來臣即親統洮賚塔庫所駐劄兵倍道進勦惟此時令回民內移途中行走不能便捷三千護禦兵丁首尾亦不能相顧擬於應援馬兵三千人中暫留一千駐劄吐魯番以防賊餘二千令歸大營如蒙准臣前奏撥兵三千駐防吐魯番臣請以步兵二千駐塔庫者撥補俟我師進擊烏魯木齊時然後令回民內移即以防禦兵一千護送可無劫奪之虞奏入得

旨應援吐魯番之舉朕早已降旨此奏尚有計算未到之處今年秋間襲擊是第一善策至於應援吐魯番乃相機不得已之舉耳若但加意籌畫於應援之師而不計及於襲擊之舉是舍本而逐末也且發應援兵丁三千名之外又令顏清如領兵二千名駐劄塔庫紀成斌領兵四十名駐劄洮賚是以派兵九千與前請旨駐兵三千於吐魯番之奏大不符合矣今年原議挑選精兵一萬二千名進擊烏魯木齊不知此

所派應援吐魯番之九十兵在此一萬二千名兵丁之外乎抑即在其內乎此兵平定吐魯番回營人馬尚可進擊乎況前奏設三大卡倫於要隘之處安兵三千名此非大營之精兵乎今稱存營兵丁尚有萬餘足以防禦假若賊人既擾吐魯番使我兵前往應援又以大眾侵犯軍營或再如上年之故智繞過大營驚擾塔勒納沁及圖古里克等處則我軍之力既分不識尚可勦殺耶或但能防禦新築城也奏摺中

總未言及此甚屬疎漏至於吐魯番一部落乃向來甚費商議置之度外者即上年遣發弁兵駝隻往彼搬運米糧亦俱未經奏聞致生賊人窺伺之心屢次侵擾此乃從前辦理錯誤以致目今有不得不應援之勢今大將軍親在軍營若確見速應救援便當遣兵迅往何必遲迴審顧且前次奏稱留兵三千名便可防護吐魯番萬無一失今又將吐魯番應否留兵及回民應否遷移何時動身之處請旨定奪前後全

不符合顯有推諉之意朕在數千里之外豈能洞悉
地方情形與臨事機宜預先一一計算而指示之乎
殊失朕信任倚賴之初心矣倘見此諭旨以為吐魯
番不應移內勉強順合朕意輕率舉行則尤其不可

丙午

靖邊大將軍傅爾丹奏報進兵襲擊察罕哈達
賊人

傅爾丹奏言臣等於五月六日至科卜多築城

處據烏蘇圖舒魯克卡倫駐防侍衛巴爾善等
擒準噶爾一人曰塔蘇爾海丹巴詢之云噶爾
丹策零發兵三萬令大策零敦多卜小策零敦
多卜及大策零敦多卜之子多爾濟丹巴率之
先後至阿爾台山奇蘭所在犯我北路今小策
零敦多卜已至策罕哈達而大策零敦多卜及
其子多爾濟丹巴未到現兵僅二萬餘噶爾丹
策零恐哈薩克部乘虛見襲預發兵萬人令大

策零敦多卜之子納木扎爾達什衛徵和碩齊
駐守阿爾輝復令諾顏和碩齊率兵一萬駐守
阿里瑪圖沙喇擘勒其噶爾丹策零游牧處自
守之兵不過二萬而已又云噶爾丹策零向令
妹夫羅卜藏策凌率兵一萬駐劄阿里瑪圖沙
喇擘勒以防哈薩克而羅卜藏策凌向與噶爾
丹策零有隙率其屬三千餘戶來至大國噶斯
地界噶爾丹策零聞之遣烏喇特巴哈曼濟追

之為其所敗復遣喀喇沁都噶爾之子察衮追之以是大策零敦多卜久之未至臣思賊兵未集宜乘其不備襲之選京師各省兵一萬輕裝由科卜多河西分為三隊於六月九日出師前鋒統領丁壽散秩大臣公達福副都統塔爾岱領第一隊叅贊馬爾薩副都統承保西彌賴領第二隊臣等以大兵繼之速發掩擊其科卜多之地留兵七千三百築城如故令都統衮泰總

兵胡傑等管轄科卜多河東乃通奇蘭要路撥
滿洲兵二千俟都統侯陳泰副都統阿三到後
駐劄統轄與袞泰等互為應援所有統兵啟行
日期合行具奏翊日又奏言臣等於初九日分
隊出兵遣前鋒統領丁壽叅贊馬爾薩副都統
塔爾岱等前行瞭望擒賊夷巴爾喀等十二人
於扎克賽河之地據云小策零敦多卜牧場在
察罕哈達去臣等軍營止三日程其兵不過一

千尚未立營大策零敦多卜因途中有病留駐
和博克山其子多爾濟丹巴已於小策零敦多
卜所住山梁之前駐劄至羅卜藏策凌已貳於
噶爾丹策零大約率其屬往土爾扈特否則逕
往青海矣臣等現在乘夜進兵襲擊察罕哈達
賊夷奏入報

聞

丁未

青海扎薩克公諾爾布叛扎薩克恭格等擒之
副都統格默爾奏言騰格里卡倫扎薩克諾爾
布於五月二十八日背叛擾亂臺站劫掠馬匹
逃往衮額爾吉庫克烏蘇游牧處臣即令扎薩
克恭格台吉阿拉卜濟等及叅領巴顏等先後
追擊比至喀喇郭勒諾爾布已為恭格等所圍
復脫去窮追至蒙古爾托羅海獲之并其佐領
里塔爾俱縛送軍營其効力之扎薩克台吉將

卒等俟核明具奏奏入報

聞

戊申

青海扎薩克公墨爾根戴青拉察卜等叛副都統達鼐等追捕獲之

副都統達鼐奏言青海扎薩克公墨爾根戴青拉察卜等背叛渡索羅木河而逃臣等率兵追之及諸河其子察罕喇卜坦來歸進擊拉察卜

拉察卜泥首迎降臣等攜之由索羅木河大路
還青海遊牧處其効力之台吉軍校等核明具
奏時拉察卜之叔察罕丹津亦相助掩捕奏入
得

旨從前親王戴青和碩齊察罕丹津一聞伊姪拉察卜
逃走即將拉察卜部下人等收回察罕丹津歷年効
力行走今已老病仍感恩効力甚屬可嘉著賜大緞
二十疋再發銀一千兩令其酌量賞伊部下効力人


等拉察卜雖係伊兄之子朕知其素不相睦至拉察卜之子察罕喇卜坦能知伊父之非不肯同逃殊屬可憫拉察卜甚屬庸愚雖無故逃遁見我兵追趕即便迎降罪尚可恕著將伊送至京師候將伊逃遁之故問明將伊交察罕丹津之處另降諭旨其拉察卜公爵朕尚欲令其子察罕喇卜坦襲替並曉諭知之

已酉

命噶斯路偵賊備兵

上諭大學士等曰大將軍傅爾丹奏稱被獲準噶爾丹
巴供云噶爾丹策零之妹夫羅卜藏策凌將伊屬下
三千戶帶領歸至大國噶斯噶爾丹策零聞知追趕
被敗等語今噶斯正值青海有事之秋倘羅卜藏策
凌率衆來歸或係賊人詭計著速行文達鼐衆佛保
等遠設巡哨偵探信息倘噶斯路途有準噶爾賊人
來歸者將我兵整齊預備務加詳審果係真實將伊
頭目數人送至京師其餘人等於汎界內有水草處

暫住從優養贍一面派兵照管一面奏聞請旨



平定準噶爾方略前編卷二十三